









特

門五  
號1570  
卷12



寧波府志卷二十八

傳四

南京兵部尚書郡人張時徹纂修  
寧波府知府蜀威遠周希哲訂正

列傳三

國朝張楷字式之慈谿人生有異質年十二能屬  
文吐語驚人十四補縣諸生十七領鄉薦永樂甲  
辰舉進士歸省遂肆力古文辭宣德間拜監察御  
史時刑部獄繫巨盜貝福全者賂獄掾詐死出復  
為盜而楷劾罷尚書以下十數人風振朝寧江寧



夏三造偽章給吳謙書牒事覺坐謙楷廉得之乃坐三有葛俊者故指揮陳旺義兒也久背旺去後與妖僧袁旭等爲亂事連旺楷覈其實遂釋旺其他理寃擿姦率類此久之陞陝西按察僉事尋陞副使董屯督賦導水利俱著成績同靖遠伯王驥巡歷三邊上安邊十二事多採用之十二年驛召赴京陞僉都御史巡撫畿甸會蝗起捕之甚力真定府稍懈輒奏械其守由是八郡震竦遂不爲災是年沙縣賊鄧茂七反八閩相挺爲變所在皆賊

藪而先是處州亦以葉宗留變聞道路洶洶詔都督劉聚討之監軍者難其人上問楷安在命以飛騎召至立拜爲監軍總制閩浙得便宜行事命文武大臣祖之得用鼓吹導騎出城以示寵異楷卽日取道疾馳至閩誠諸軍無得秋毫犯民間師次鉛山聞賊圍將樂急遣將日夜兼程往擊之賊大潰退保陳山次建寧與聚等謀曰賊亦赤子也始于有司暴征不能忍乃舒發其怒心宜喻以朝廷德意撫之卽不伏兵之未晚也時副使邵完譽



曰日者兵部降招榜無印文賊不信今榜招之有印賊乃信時軍中寔無印楷曰將在軍君命有所不受况以便宜推轂乎若請而後行非計也因矯爲征南將軍印榜招之賊果降散去者十七八獨茂七猶負固用其降將羅汝先誘之使出攻延平楷乃集諸將授計令浙兵伏前洋江西兵伏後岸南京兵伏沙溪南以閩兵孱弱雅爲賊所易者挑之賊果出戰有頃伏起合擊大破之先命都指揮雍堃陰置火器船泊溪北灣賊敗走者約五萬人

果從溪南奪橋渡船上火齊發死者以萬計而官兵急追之生擒者七十四人茂七死亂鎗中指揮劉福斬取其首獲船百十四艘先是都督陳韶敗北陣亡論者以爲楷罪朝廷復遣寧陽侯陳懋平江伯陳豫兵部尚書金濂領兵來助討會賊新破餘黨四流遂與懋等分地殲之時楷發延平賊遮後洋道楷以舟師逆之而劉聚兵潛繞賊背夾擊之至前洋俘殺無算遂乘勝攻石門攻王臺館直入邵武取峽陽十九等都寨盡拔之乃結營觀音



山下其西爲九龍山兩山巔皆賊寨師至會日昏  
即遣卒五百人人持二燎環山走達曙以懾賊又  
選精銳三千持勁弓巨炮分伏觀音左右麓復遣  
兵二千駕舟入九龍峽斧其筏誠曰明日賊必空  
寨下鬪若等疾入據其寨反攻之比旦賊果空寨  
下至溪無筏不得渡還九龍而向所遣二千兵已  
據其寨盡發其滾木檣石下殪之死者以萬數觀  
音遂平忽有報歐寧女將廖氏妖術甚奇附者若  
魚鱗楷遂身先率兵擄之械送京凡破寨三十六

擒僞引班學士及總兵等官三百二十四人招降  
八十餘萬人斬獲無算初葉宗留與茂七同起宗  
留死陳諫胡繼之都督僉事徐恭討而未克勅楷  
旋師倚角之至金華聞徐兵次金公山楷即倍道  
進援至則伐竹制鴨兒箆三百五十面人竊笑之  
而賊用長戟其鋒不可犯遇賊輒樹箆爲壘戟入  
即不復出時賊適至楷謂曰鼠狗賊汝不知我斬  
鄧茂七耶趣降我否必齏粉汝賊落膽去楷策其  
復來即部署以待明日賊果益衆來索戰楷與聚



親督陳中乃洋北賊直先攻中營楷傳令馬上射者前薄之賊不能支死者三百人左右二哨合擊死者又百餘人賊前突者鴨兒篋格之奪其戟賊皆赤手走遂生擒諫胡及其徒百二十人得級六百有奇遁去率散處萬山中各相雄長於是開誠榜諭下者數萬戶計擒渠魁數十人景泰元年班師入朝時尚書金濂位在楷上而寔以勅聽節制且忌楷功因收前所諭榜矯印者具進而給事中葉盛等復以前陳韶事爲言下憲院覆奏適都御

史余仕悅與楷故有郤因黜其功削職歸天順元年詔復僉都御史致仕明年楷入謝因獻中興頌時陝西方用師議用有文武才者佐之大臣皆薦楷往事竣改僉南京院事四年冬進萬壽表入京以疾卒楷少孤事母極孝爲人坦夷闊達善推轂賢者雖抱片善輒揄揚之又急人之難居家不問生產好客樂施故家無餘貲其學自經史至天文醫卜小說釋老家言無不通習善行草篆隸尤長于詩豪爽宏麗而格律嚴整有晉唐人風所著



有陝西紀行集百琴操四書糠粃大明律解律條撮要廣事物紀武經小學等書各若干卷藏于家孫昂別有傳

司馬氏曰楷真振世之英也其平閩浙時率用儒家學從容指麾銷鋸刃于朞月間罔所諱避而忌者遂媒孽其短落籍爲編萌亦已甚矣而吠聲者一不之察如皇明通紀水東日記咸詆其舉動大怪豈豪傑舉事固多負俗之累而人心忮忌不復一顧天常哉惟其以畎畝之蹤復官於家萬里走

闕下以謝乃復以頌獻砥節之士以是爲噤焉王來字元之慈人生而英邁秀偉方兒時人已知其不凡父尹和爲金溪令邑有五聖祠善爲禍福來自負宏達不信邪妄一日持斧往碎像而燬之撤其祠衆驚異焉宣德改元與仲弟復同領鄉薦會試中一榜授新建教諭未三載朝臣交薦陞監察御史持正不阿紀綱振肅巡按蘇松敕同侍郎周忱考察官吏人服其公乙卯陞山西左參政正統丙辰調廣東先是倉儲久腐奏以歲徵折銀餉



邊寬西北人民轉輸之勞 上嘉納定爲令戊辰  
陞河南左布政使時流民數十萬屯聚奏請土着  
撫御備至卒彌其患己巳河水衝溢乃築堤植柳  
捍之民賴其利是年陞都察院右副都御史諭撫  
河南湖廣凡軍民利病官吏臧否悉聽便宜處治  
尋賜敕褒美焉景泰庚午貴州苗賊猖獗陞右都  
御史總督軍務殫謀積慮晝夜矻矻前後斬獲以  
萬計執渠魁韋同烈紀歌獻于京餘黨悉降獎賚  
益隆壬申加兼大理寺卿癸酉班師 上召見便

殿重加慰勞陞南京工部尚書條陳時政十二事  
其目曰敦教化以厚民俗勸農桑以益本業揀冗  
官以省濫費罷造作以甦民力明賞罰以勸事功  
崇師道以育人才修武備以振兵威抑奔競以勵  
士行嚴選舉以進賢能選將帥以寧邊鄙增屯田  
以紓民運宥荒政以備旱澇蒞事逾年疏剔釐正  
百役就緒丁卯 英宗復正大統賜致仕來爲人  
通敏有識豁達不羈善談論好獎拔士類歷仕三  
十年文才武畧爲時所重至於葩辭藻句援筆立



就乃其緒餘也子鑰中浙江鄉試授監察御史第  
鼎端方嚴毅言論誠確正統中舉明經授本縣儒  
學訓導跬步不離繩墨當道交薦陞監察御史執  
法堅正不為權貴所撓巡按山西有知縣郭某者  
貪而善賂鼎瀕行當道交口舉郭鼎固心異焉臨  
縣郭倍道遠迎承奉周至愈益疑之因摘發其姦  
罷黜之民歡呼動地代還陞江西按察僉事鼎廉  
名素著下車之日賍吏聞風解免未幾以憂去服  
闋改廣東時流賊剽掠四境騷然鼎歸其妻子期

以盡瘁事國涉險阻觸瘴厲不避所得俸資節口  
自食而以其餘繕飾器械一日出巡為賊所得昇  
至寨中時有二王僉事一為吳人頗貪而多藏賊  
誤喜以為可以媒貨其中一人識之曰此浙江王  
僉事清官也不可犯遂輿送二十里拜謝而去賊  
既平鼎以年老乞歸都御史韓雍鎮兩廣素知鼎  
廉出白金百兩為贖鼎固辭不獲比至中途因叅  
政張瓚反之封誌如故雍嘆息久之仲子鋹登進  
士第仕大理寺副善詞翰早世



陸瑜字廷玉鄞人年十四補邑博士弟子員登宣  
德癸丑進士授刑部主事陞員外郎蒞事精勤詳  
讞明允能聲籍籍慮囚淮揚諸郡多所平反廬州  
有梓人營作巨室以私啣故爲幻技置屋梁間主  
執訟于官坐魘魅罪瑜按其牘謂造厭魅符書呪  
咀者以謀殺論豈幻技例乎乃坐匠以他比及釋  
諸郡繫囚三百餘人從末減者以十百數比復命  
陞郎中丁外艱服闋補任先後在部十八年度事  
慎法無毫髮呈吏議陞山東右布政使適齊魯大

侵貧民相率鬪取富人粟監司坐劫罪瑜曰民苦  
饑取粟延殘喘以免道殣耳即道殣免而復殺之  
乎竟從輕擬已乃轉左布政使李賢嘗薦於上天  
順二年刑部尚書缺屢推上不獲俞旨密諭非瑜  
不可者遂下詔徵拜及陞謝 上語左右曰刑部  
職司民命廼今得人矣瑜爲尚書十八年明於法  
比練習國家典故屢辦滯獄人以不寃時錦衣指  
揮門達怙寵作威弘農衛卒誣奏指揮李斌不軌  
事下達鞫之達鍛鍊以逆狀具獄會廷議瑜獨明



其寃達怒語侵瑜瑜曰瑜所執者祖宗之法柰何  
枉人至族耶達譖瑜私出反者罪上不聽止誅  
斌已而達尋敗言者欲置之死李賢質于瑜瑜曰  
達典制獄任情輕重不爲無罪然視紀綱馬順則  
有間矣達卒得不死曹欽之異謀也變起倉卒昏  
夜被執既而以不胡辨其爲瑜也曰是素平恕遂  
釋不害時武夫有希功者執欽佃人數百輩爲逆  
黨瑜曰欽謀倉猝諸佃相去或數百里安得一旦  
與謀乎竟得不坐瑜用法寬厚類如此致仕歸闔

門養重十有七年卒賜謚康僖

陳濂字德清鄞人敏悟夙成登正統乙丑進士授  
南京刑部主事明習文法一如素官時有鎮海戍  
卒故亡賴誣衛指揮以下數十輩不法事同獄者  
又代爲僞帖以質其姦株連逮繫乃以屬濂遂得  
其情法僞帖者而釋其餘譽益用起已乃署真外  
郎事尋陞廣東按察僉事轉副使巡視海道海故  
盜藪而圍山又瀕海盜勢猖獗濂輒親冒矢石出  
奇應變日夜露禱誓不與賊俱生忽雷電交作風



雨晦冥盜迷曠相擊殺俘馘無筭海南肅然歷陞  
廣東左布政使尋陞巡撫廣東都御史廣人益欣  
戴頌聲大作時荐歲兵興供億師旅勞止日甚濂  
懇懇矜惻如或傷之已又奉命總督漕運晝作夜  
惟勤疏濬嚴監督立程度輸運無後期兩淮故南  
北孔道諸豪家漁獵貲貨率多橫暴凌啖庶姓悉  
裁以法善良咸獲其所丁內艱去適河南缺巡撫  
上謂非濂不可者詔起復濂灑泣就道未幾又  
命巡撫北直隸兼巡紫荆諸要害明年 上又以

以漕運事重還濂原任比至淮疾作卒於蘇

屠瀟字朝宗鄞人生而聰敏駿發爲文下筆滾滾  
千餘言一時行輩皆下之登成化丙戌進士試監  
察御史時王襄敏公鉞掌院事大器倚之凡所論  
列叅駁皆自瀟手勅往湖廣盤糧已又巡按四川  
皆有著政後用襄敏公薦陞本院右僉都御史已  
復陞右副都御史進右都御史以李孜省黨媒孽  
改南京弘治改元勅總督兩廣軍務柳州諸處舊  
皆番戍風土殊習比歲死亡過半瀟爲區處分戍



多所全活入掌南京院事尋陞左都御史加太子少保時災異屢見瀟歷疏時弊二十事 上悉允行九年轉吏部尚書進退黜陟無所私而以愛惜人才爲重每注選至烟瘴地多濡筆不下必擇宜其風土者爲之因奏爲著令尤痛抑僥倖或造請者必寘之遠地時多內降官瀟因論奏謂天下士事詩書而躬案牘突銛鋒而竭筋力者積數十年不得官而白身之人奔競乞憐或緣技藝蒙幸如拾芥不可以爲訓由是內降稍減言官有欲開納

馬之例者瀟抗疏曰朝廷倉庫及太僕見積尚多釋不用而開是例萬一聞於北虜將謂中國空碣且生戎心議遂格清寧宮新成詔許番僧入宮慶讚瀟率大臣再疏諫止言甚剴切給事中魏珙等因事下獄又率衆極論出之周文端公經將謝政即疏其剛方有爲不宜輕遂其去及召問執對愈堅至拂 上意不避欽天監奏彗星見瀟會九卿條陳十餘事曰早視朝勤聽政汰冗員節財用省差遣處莊田清鹽法申禁例脩武備壯軍威恤官



軍恤邊民停改造惜供應黜異端警驕惰防詐僞  
皆切時弊已而乞終養歸適丁外艱居於家會  
武王即位馳勅召之仍以太子太傅吏部尚書兼  
左都御史掌院事逆瑾顓權方嫉言官累因言事  
欲罪之瀟曰此瀟寔主之御史稟承而已又大起  
羅織之獄欲於律外比擬滋重瀟執不應瑾又以  
宿憾鈎擿前兵部尚書劉大夏欲寘之死瀟爲申  
庇卒得減論有御史巡按雲南瑾誣以枉道瀟力  
白其非時瑾累撓瀟瀟亦數忤於瑾疏乞解任而

歸瀟平生慷慨自許恒以廣言路惜人才爲已任  
立朝論事皆得機要嘗自謂手持此筆掌刑獄惟  
恐誤殺一人掌銓衡惟恐誤黜一人其存心大都  
如此故不知者始疑而毀終服之無異議子徑正  
德辛未進士以試中書進吏部文選員外郎郎中  
有俊才詩賦書翰尤雄一時丁內艱居家卒  
金澤字德潤鄞人性至孝童時父以事遊京師乃  
昕夕禮辰請禱旣長工舉子業由成化丙戌進士  
授刑部主事改南歷任郎中讞獄明允人以不寃



遷四川叅議播州宣慰厚饋以金幣毅然麾之至以庶長奪嫡竟寘之法革三長官司撫安七十二寨夷民駢首歸命流賊李廣蝟聚五千餘人戮通江官吏傾其帑藏東鄉王伯榮效尤犯順焚蕩縣治澤前後設畫偵其渠魁而殲之銅梁新設民多負固拊循有方咸帖帖服夔賊野王剛鼓衆猖獗克斤湖陝上命三省督兵會勦澤下重賞之令竟礫剛于市歷陞廣東布政使百廢具興無何贛寇陸梁宮于近地命澤爲右都御史巡撫江西總

制閩襄南廣便宜從事澤振勸風紀嚴明節制一不如命輒斬以徇流賊滿天明等一時俘馘殆盡徭獠諸蠻靡不聞風向化民至今稱保障焉

**葉海**字用深慈谿人生而秀朗勇於爲學由弟子員入太學六堂諸宿儒咸爲推重初授湘潭知縣平恕明信旣三年縣遂稱治用兵部侍郎李公薦召陞平度知州州民素驕悍爲州者舉手高下輒落其機牙噤不敢何問海至一繩以法首除雄姦鄭洪被中以飛語繫刑部抱慙而卒輿論惜焉



王夔字友倫鄞人由賢良任左軍都督府都事宣德中改令仙游先是邑人積苦征歛多逋播者夔至撫字有方科差不擾首奏免小嶼寨土兵之役乞隣邑助楓亭驛厨傳之供計都里以均坐派條征輸以完積逋民漸復業政既成自解治壇壝以及倉庫門路悉葺治之民不知有役也比三年卒于官邑人哀慕不已立碑頌德建祠祀焉

陳鏐字良金慈谿人領景泰七年鄉薦授桐陵令政尚寬厚愛民如子民亦愛之如父至馭吏則執法不回清慎之節終始如一後引年歸囊篋蕭然遺子孫以清白惟以山水文籍自娛故號爲樂泉

云

王子沂字思詠奉化人由舉人授太平府學訓導用薦入爲司直郎轉監察御史陞江西按察司僉事被謫桑乾洪熙改元薦復監察御史巡按貴州用夏變夷邊氓化之時乖西夷民爲亂子沂深入其地多方撫處其黨畏服解散竟以勞瘁成疾卒于行臺里人應履平時爲按察使爲之棺殮以歸



子沂爲人介直負氣岸自始仕至終唯足食奉而已無營於私尤善詩所至吟詠多可傳者

邵玉字德溫鄆人舉宣德十年鄉試授汝州學正秩滿陞南寧及河間府學教授九年最績轉順天府學用兵部尚書馬昂薦擢雲南按察司僉事提督學校已乃以足疾納祿而歸性至孝痛母早喪即宦輒萬里必將父以養其教士先嚴義利之訓以身爲範在汝州歲饑民多莩死輒捐俸煮粥以活餓者嘗三典文衡在山東宿傳舍逢囊金來謁

者輒矢天却之在山西懲前事豫作誓神詩以自見比在江西得人尤多有市首飾者直可百金妻取而玩之輒謂曰汝欲之乎使婦飾百金爲之夫者難乎其爲廉矣卒以清約終身語在門人李東陽閣老所爲表中子莊舉進士仕終按察副使

錢與字文煥鄆人祖安辟授臨安訓導陞韓府紀善致仕永樂初召至京請老賜敕歸田以學行稱與舉正統丙辰進士授戶科給事陞廣西叅政時義寧賊起衆議轉餉與請給兵以銀因糧于敵議



者詘焉後潯州老藍寇起以單騎諭平之士官岑  
豹羅文愈以地訟爲宣布威德皆帖服焉尋陞湖  
廣左布政使時大旱諸郡以徵楮告亟疏請止之  
又啓請楚藩稅銀三千餘充運船直公私便焉丁  
內艱去服闋補廣西民相慶曰不圖復見錢叅政  
也時都御史韓雍征大藤峽會歲侵以軍餉爲憂  
負措置得宜上下充給凡所俘虜尤極詳讞得活  
者甚衆力請致仕善攝生之術以高年終于墳字  
廷佑弘治己未進士初令潛山繼令青陽皆有惠

政歷官廣西副使嘗行部至梧夜夢裂麻婦持牒  
哭異之時有王姓者爲兄毆殺監司出其兄其妻  
刁氏訴姪毆而刁乃死矣翌日瓚鞫繫囚按兄牘  
年六十而弟方四十謂衰老毆強壯安得遽死此  
必姪毆之因悟夢中之婦乃刁也毆者服辜衆稱  
神明已而免歸囊無長物紛華勢利澹如也因自  
號括庵云子嶧嘉靖甲辰進士  
姚堂字彥容慈谿人年十三能屬文二十二舉進  
士拜工部虞衡司主事歷陞郎中先是部以出納



故藏姦隱穢率爲仕者厭薄堂自奮曰此在人耳  
豈官使然哉遂勵操尚官評爲之增重陞廣信知  
府郡有疑獄堂至立辨庶政咸舉巡按御史韓雍  
特表其治行爲江西第一以內艱去服闋天官姚  
夔知其賢即家起知蘇州府蘇故多羨餘歲以億  
萬計堂悉籍公帑以備賑恤及修孔子廟與先賢  
祠先是豪勢人道蘇者輒厚索堂下令驛廩之外  
不得加毫末民用日省人情大愜會以事忤巡撫  
劉孜乃移守鎮江而以鎮江守林鶡更之牒至堂

即日行什器帷帳一無所移蘇民擁轍遮留不可  
得乃脫其履懸郡門以表去思相與謠曰雙木作  
篙不如一桡士林頌之以詩有袖歸白壁元無玷  
移去寒梅不改香之句及治鎮一如蘇政通惠洽  
流民復業者九千五百餘戶丹塗令賴正時宰王  
公甥也怙勢縱恣堂一裁以法賴始自戢堂亦坐  
是久不調刑部尚書陸瑜疏堂糞鹽之守以薦始  
轉廣東叅政既以入賀過家卒堂三典名郡皆著  
異績而尤所注意者興學養士恤孤舉遺褒表名



賢以禮化民故所在民懷其惠爲立祠祀之仲子  
鉢有雋才領浙江鄉薦鉢子潛舉呂柟榜進士  
周濠字文淵奉化人舉正統戊午鄉試明年登施  
槃榜進士知彬州之永興仁摩義斷綽著能聲遷  
知光州天順間朝議增設提學憲臣乃遷濠山東  
按察司僉事興教育才遠近稱慕門下士多顯名  
者九載陞江西副使卒門生宋漢以御史巡按至  
王璟以都御史賑濟至皆弔其墓哭盡哀  
田玟字廷玉奉化人自少警敏家貧力學正統八

年進士授刑部主事持法不阿門無私謁推讞詳  
明而濟之以恕所案無寃者尚書魏源多其才每  
遇疑事必以委玟玟盡心訊鞫以勤勞致疾疾且  
亟有指揮坐重律以白金五百賄之玟閉門不納  
曰吾病且死得無愧于心足矣恐以五百金虧平  
生乎與家人訣曰吾上不能養老母下不能教吾  
子天降之罰以是累汝輩耳遂卒家無一錢之畜  
自司寇而下與素所游者皆致賻始克棺殮焉  
劉煒字有融慈谿人風儀峻整遇事英發無所避



登正統乙未進士歷戶科都給事中屢上封事劾  
姦祛貪人憚其直每參朝議一二言即決同時林  
聰疏事有條煇論事簡截時以林聰手劉煇口目  
之遷廣東叅政分隸惠潮地險多寇煇至設方畧  
與民約束號令簡嚴盜聞輒解散時四境皆盜區  
無完郡獨煇所部晏然無警民甚安之留四載不  
代移守南韶賊輒不敢犯界成化改元王師徇兩  
廣韶當師衝百爾軍需皆煇區畫晝夜靡懈觸瘴  
癘卒民皆巷哭焉

**梁輯**字用光由舉人正統間任直隸太平府推官  
明刑釋寃擢山東道監察御史激揚有名內艱服  
闋復任以直言出知河南汝陽縣未幾復補道以  
病終于京子憲亢節尚義爲世高士曾孫材少有  
文名以選貢教諭懷寧抗直忤時辭祿而歸

**鄭岑**字子高慈谿人以進士爲刑部主事公平端  
肅爲大司寇劉公所知委看詳諸司奏牘京民揚  
才妄取人財事覺亡去時有業裁衣歐陽者俗呼  
陽裁捕逮之考掠成獄岑偵知爲府胥所陷即與



平反愚民沈政雷泰坐法擬死岑察其枉矜而釋之其論刑求生于死類如此出守揚州擇庠生邵浦輩會講資政書院建社學以教群子弟士類興起天久不雨岑袒跣禱于群望雨輒應遂復有秋居憂服闋改永平復夷齊之廟平東門之險舉養老之典飭軍衛守禦之方寢遷安銀礦之擾罔不盡力二郡前後歷任凡九載上考功課最懃乞歸老冢宰尹旻稱岑一生操厲且年未及艾高其節特請進階山東右參政致仕

江勛字元勛奉化人景泰五年進士擢河南道監察御史兩命巡按山東湖廣時山東苦飢民多流亡乃設法賑貸田野安生湖湘旱澇相仍穀價騰湧民不堪命而內臣銜命將啓局造紙聞者洶洶勛秉燭上疏罷之比還京總憲者委看詳三法司事適曹吉祥構難宣廟震怒憲臣奉行天討勛侃侃持正盡心讞鞫獄詞數千言下筆立就諸大臣深器之擢廣西按察使蠻峒弗靖連歲發兵搗其巢穴勛謀畫撫綏昕夕匪懈斥貪去暴綱紀振肅



當道者交薦以內艱歸先是勛為御史嘗薦其里人汪綸袁勗以明經授訓導勗屢過勛門未嘗入謁勛子弟以為言勛曰此吾所以舉勗也其性度如此服未闋違疾卒

後有名鑣者正德甲戌進士仕終雲南按察副使以介特稱

董琳字廷瑞鄞人景泰五年進士除南京監察御史時戶兵刑工四部尚書及國子祭酒皆不職遂抗章論之掌南京錦衣衛事都指揮劉敬父子怙勢肆虐言官莫敢誰何琳獨疏其不法敬遂逮繫降黜而子亦戍邊風裁凜然轉山東按察司僉事

劬勞職事以疾乞歸卒子鑰字啓之弘治庚戌進士補上海令興利除害頌聲載道陞監察御史未幾輒屢上封事如論救副使楊茂元等此其尤大者既而出按雲南鎮守太監孫景與都督盧和交構累經按鞫莫敢與決鑰承旨一訊輒得其情皆寘諸大辟巨豪怖懼焉及劉瑾竊柄除不附已者乃矯詔逮之勒令致仕瑾誅復徵竟以病不起從子鰲字濟之舉正德辛未進士任戶科給事中吳桓字廷用鄞人父江正統間以閭右徙實京師



桓侍行中景泰癸酉順天鄉試選汀州府通判嘗攝守事剖決若流庭無滯訟時漳州衛官以高貲豪舉于鄉凌轢儕輩至死上下結納莫敢誰何積十數年不決桓被檄按之輒置于法上杭阻山爲固溪南民多反側桓撫以恩威卒服其化已而朝廷遣重臣巡視民訛薄勦之輒嘯聚欲亂桓單車往諭衆遂帖然時遷長汀縣學立歸化縣治城上杭大役屢作而不率民一錢丁憂服闋改常州職專督賦賦戶長歲致千金爲壽名分例錢桓峻

却之時王文肅公語人曰管糧官不受分例者自洪武迄今僅兩人周同知與吳通判耳秩滿當遷常民詣闕上書留之陞本府同知九年加四品俸又五年剔蠹釐姦吏墨用洗他如均徭役導水利平賦稅修橋梁招流亡給種佃田歸者相望宜興山崩暴水墊溺瀕死者衆桓即發倉粥之又捐俸爲儀勸富民出粟以賑靖江濱海風潮蝕田額稅無辦躬爲核實以新漲沙田米補焉郡亢旱不雨桓徒跣詣橫山龍祠致禱以不職自咎歸甫及門



而雨乃遂有秋撫按凡七上章薦謂宜大用而桓  
以病乞骸骨進階中憲大夫常州府知府致仕璽  
書褒嘉詔有司禮之歸三年以疾終子照霍山縣  
知縣季子杰宿松縣學訓導俱以淳德稱

陳淳字德溫鄞人幼有雋才甫九歲能作長松賦  
景泰癸酉舉于鄉知欽州蒞政廉明時靈山民有  
死獄株連數百人會大暑牢戶皆滿淳止繫當罪  
者數人餘皆出之守大怒淳引法力爭竟不能屈  
舊有義倉儲穀二萬餘石積爲豪強所侵悉徵理

之歲適大侵民賴以活新學宮以興文教却珍珠  
以綏夷獠政稱神明撫按賢之以廉州知府會薦  
命未下而卒弟英字廷賢舉成化壬午鄉試壬辰  
進士知廬陵縣疏困均賦戶口繫增會天大旱潔  
齋以禱雨輒應三遭鬱攸焚香告天即風止火息  
士民以三異頌焉歷任九年陞監察御史以風裁  
著聞淳子瑞字鳳儀中成化癸卯鄉試丁未進士  
授中書舍人陞刑部員外郎郎中用法平恕奉命  
慮囚兩廣多所平反如潘玉以過殺論死東筦民



有以男醉死弟自經誣人大辟者悉讞出之其情  
罪允麗者即威富弗能奪也會觸瘴暴卒人多傷  
之英從子玘字國祥舉嘉靖壬辰進士歷南京刑  
部主事改車駕復改監察御史瑞子侃字應和舉  
嘉靖丙戌進士授行人進刑科給事中光祿寺少  
卿南京太僕寺少卿始玘與侃未第時同業郡庠  
以文學德行相師友比在臺諫俱以剛直名談者  
以爲一門之盛云侃嘗爲權貴計陷使日本瀕死  
復生語在使琉球錄中

李衍字文盛鄞人貢入太學中順天乙卯鄉試會  
王振承張太后旨選衍寫經托疾弗往因久次  
不銓遇恩例授廣州府推官屢辨冤獄以撫勦反  
寇有功陞刑部員外郎時曹石用事亨家人奪民  
產訴於朝衍承命往勘歸田於民大忤亨意諷錦  
衣門達搆衍重罪謫戍宣府亨敗得復官還田里  
以孝友稱

馮吉亨字伯通慈谿人操履純篤德性溫恭由進  
士試兵科給事中辭不就乞補教職授龍泉教諭



澹泊自守立教有法約人以禮士風丕變比九年  
考績將遷又辭改青州教授守身訓士一如龍泉  
學者翕然宗之致仕歸隱於慈湖之南吟咏自適  
名利不緇稱爲湖南居士年八十一而卒

葉瓊字彥英慈谿人領鄉薦歷升安慶郡守爲政  
平恕惠澤及民語在安慶名宦志中有羅氏誤陷  
極刑莫爲之白瓊覆案適有風霾之異輒矍然曰  
得無冤乎頃之遂霽竟直其無辜人咸頌之後裔  
代有聞人至應乾舉丁未進士尤稱卓異

周翔字鵬舉慈溪人由歲貢入監第進士選江西  
道御史綽著風裁值英廟復辟勵精化理遴選  
良碩用寄撫循乃置之首列出守安慶陞辭之朝  
宣詣文華殿再厯戒諭賜寶鏹千緡光祿寺酒  
飯皆異數也在郡幾及三考惠懷小民禁制豪族  
剷革弊政條布新規十餘事其後遵行不廢以足  
疾乞休百姓遮道泣留不可得建祠祀之

桂璉慈谿人成化間貢授無爲州巢縣訓導素行  
純潔克振師模因明倫堂後逼五顯廟巫覡鐘鼓



朝夕喧闕妨于絃誦璉白郡毀之而知縣李進惑於禍福固執不可璉率諸生竟毀之爲李進所搆獄下通判鮮敏毒訊致死後進敏亦相繼死人以爲殺璉之報巢之士子祀璉于學宮

張愷字德和鄞人宣德中以太學生選補江陵知縣遷工部主事進常州府知府命下而卒愷始爲江陵時王府校卒見令坐不起即督王杖而遣之王爲不法張甚愷白守曰王不可繩以法而吏又不得問宜密聞于朝請 上治之遂與守列上其

事朝廷察王所爲果不法遂廢錮終身邑人快之守未嘗以屬吏待愷常呼曰大尹時朝命總兵都憲征交趾所過州縣官吏無不遭譴者道江陵愷以鼎肉餉軍一軍咸喜總帥奇之欲試愷倉卒日晡行牌立取火爐及架數百愷即命木工以方膝卓鋸半脚即其中坐鐵鍋然火又取竹束火燎數千愷即遍收民家箬簾應之又取馬槽千餘愷即使針工屏各戶婦人以綿布縫成槽綴槽口以繩用木椿張其四角飼馬良便卷收前路足用三事



皆應酬於倉卒總帥服其才智嘆曰真才也即奏  
爲參謀不下比去任縣人祠祀之遷工部主事周  
文襄公忱巡撫南畿例以戶部督運文襄特奏愷  
同行每到州縣必先以愷不可犯告之松守欲嘗  
愷以美綾三百疋置舟中來迎比登舟見之悉以  
綾封於庫欲舉劾守懇祈得免由是守長皆自重  
犯法愷於吏治精敏果幹臨事機張鍵閉即有隱  
姦目所指取必得其情故豪人猾吏不敢有所觸  
犯獄無繫囚稍積數人即決遣之從子參政琦嘗

論著愷事爲詳二頁共四頁

盧瑀字希玉鄞人登成化己丑進士授刑科給事  
中疏罷淮揚貢賦十餘萬緡及西北勒市戰馬宿  
弊又劾巨璫田興梁訪等竊柄引用姦僧異曉妖  
術罔上事直聲大振有温州衛指揮戴勲以遺孤  
爲庶長所孽庶長賊結當路多爲之地瑀知狀乃  
言於兵部尚書馬文升事竟直初未嘗相聞也已  
而勲頗知之以二百金賄瑀母氏之喪遂峻却之  
服闋陞工科都給事上天變忤旨廷杖逮獄出爲



長沙府通判未幾陞真定府同知詰暴撫良能聲籍籍當道上其治狀三原王恕見其考旌異之陞廣平府知府廣平故牧馬地豪貴家數侵匿而委其徵于貧戶瑀乃剗洗姦蠹盡反豪貴家侵地民困大起興學勸士日進諸生於庭指授經義三輔之地蔚然稱儒林焉有張叅將者素以高貲甲於郡逮誣繫獄前守嫌避置不理瑀慮囚竟按牘出之比引年張托其母懷千金為壽致於帷廡瑀覺竟謝不受既歸日與洪司馬常輩結社賦詩為樂

瑀美丰儀制行高潔重交游寡言笑絕口不談人過弱冠時有隣女手製純袴遺之即毅然斥去終身不趾其門知者重之

**王愷**字宗元定海人少孤力學領成化辛卯鄉薦授薊州學正薊人簡朴鮮文愷教以浙中文獻捐俸以展諸生之貧者多所造就發科第為名卿佐嘗考試山西有以重貨啗之者愷峻却之遷平原令遇旱愷齋戒禱雨雨輒應禾稼以登齊俗多盜有麥商夜經村寺被劫陳於縣愷故匿其事陰令



販荳者和少熟荳其中夜過寺門復劫去令捕兵  
易服就寺僧貨荳中有熟者遂收捕不待訊而服  
自是盜賊屏迹稱爲神明後權要以非法相強愷  
曰令可去國法不可撓遂求致仕家居三十餘年  
號樂休居士有樂休集四十卷

章銳字元進鄞人登成化壬辰進士官刑部主事  
遷郎中剖析滯獄法比精於老吏有中貴橫欲奪  
鹽商利搆其罪株連幾百人事下銳直其枉不爲  
撓後守鳳陽會有群爲巫覡者吏捕當以反逆銳

廉知其寃用左道惑衆誅其首而杖釋其餘 孝  
皇御極應詔陳言上鳳陽軍民利病及天下時政  
率多議行明年戊申復上時政十八事在郡省減  
修陵冗費數萬壬子旱蝗罪已雩禱雨輒應復疏  
蠲稅三之二陞湖廣叅政所至撫流移節浮費禁  
劾岐府官校不得橫攫市貨時衡州建雍府邸第  
銳爲程督省工費鉅萬會錦田苗獐反山多瘴癘  
當事者憚不行銳獨蒙犯霧露以孤軍深入平之  
竟感疾卒於臨武於時猶囑從吏某事如何某事



如何盡瘁王事逮死不忘從弟鎰字元益登成化  
丙戌進士改翰林庶吉士轉兵科給事彈劾不避  
權貴時灌頂法師得幸王公貴戚皆膜拜受戒鎰  
極言其以夷教亂風俗乞正典刑以清朝廷疏入  
灌頂遂失寵直聲振一時陞都給事論列剴切權  
勢歛跡後以大忤威寧伯王鉞避難久之歸以詩  
自娛有樂行稿藏於家鎰從父繪河南布政使紹  
京闈貢士皆從祖和撫而教之胥以成立人多和  
之義稱爲篤行君子云銳子濟孝友醇謹父母卒  
喪塋盡情不以煩伯氏會伯氏暴之甚輒携室以  
避產業一無所顧又徐徐懽伯氏并禮諸從子終  
不匿其怨宗黨有急時出藏琛券土田爲之資即  
受侮不爲動平生無詭言貌情老於庠校士皆稱  
之從子瀚亦以行誼聞其子槩嘉靖乙未進士  
孫紘字文冕鄞人成化戊戌進士授鎮江推官以  
廉明稱擢南道監察御史南都有國戚橫奪民田  
萬計民灼其勢莫敢言言亦莫直紘至悉稽板籍  
奪還民太監郭鏞犯後湖私渡禁無所忌紘抗章



劾罷之已而守備蔣琮冒奪民廬洲侵後湖墾地  
爲田多不法紘復率諸御史共劾之竟不競坐謫  
廣德州判陞知州專務德教持大體不爲煩苛威  
行豪強而良善者不知有官府期年境內鸚鵡產  
白雛譙樓巢鸚乳鶴城南之汚瀆不澄而清州民  
爲紀其祥于后卒于官紘少貧母病思猪肉不可  
得乃爲庠士傭書取貲買肉供母母含淚啗之及  
祿終身不肉有問者佯以疾對居官竟以清節終  
其身云

楊文卿字質夫鄞人少穎敏不凡十三通舉子業  
弱冠入郡庠發解浙省第一舉會試第二初授兵  
部主事丁父憂免喪改刑部主事時有尹清者夜  
飲殺人事覺匿豪家令其妻賄同飲者張鐸承之  
文卿一訊知其誣根捕尹清豪長者爲請不聽竟  
坐清而釋左驗者逋寇席英王勇白晝殺人邏者  
不能得追躡賊所過逆旅主人逮繫之有夏廣才  
者坐窩主論死文卿爭之曰廣才迫於凶暴飲食  
之耳何物之窩竟出之如廣才論死者二十人皆



得釋人以為平陞山西提學僉事嚴條約公勸懲  
嘗曰考試糊名此以革提學之弊非革士子弊也  
不自為弊安用是瑣瑣者哉乃竟不糊名士無異  
議屏巫覡毀淫祠凡緇黃之居皆更為社學選秀  
異子弟讀書習禮其中士風民俗為之不變陞山  
東提學副使其教一如山西以積勞致疾而卒文  
卿外員而內方平居恂恂和易臨事即確然不可  
奪臺省中有大事若重獄衆論紛紜一言輒中肯  
綮罔不帖帖服居官律已務為清約門無私謁室  
無長物其死也橐無餘貲惟圖書數篋而已所著  
有菘畦集筆談類橐茗溪集若干卷子叔達隱不  
仕以孝義稱叔通第戊辰進士歷南京兵刑吏禮  
四曹陞湖廣提學副使積官至山西左布政使乞  
納祿而歸廉儉不愧其父如從宦山東却賻金數  
千在山西歸餘金鉅萬于公人皆高之

薛穰字有年鄞人宋知衡州朋龜十一世孫也性  
聰敏好問學成化壬午舉應天鄉薦授涿州知州  
涿俗素強悍兼歲大侵盜賊四起穰至鋤強彌盜



親問民所疾苦而醫療之發粟賑饑賴以全活者  
億萬計三年用薦改知灤州灤故孔道徵發驛騷  
穰徵輸供億咸得其宜不煩而事集州歲苦河決  
穰築長堤以捍之遂為永利致仕歸橐不入私室  
置業與昆弟共之散其餘祿於鄉族力行善事日  
以粉簡記之倣古人黑白豆之意博學能文詩宗  
唐人書法學鍾王

沈元字德元慈谿人端憲公九世孫天性古樸貌  
符其心以進士知南陵縣值歲大侵民洶洶不保  
元發帑藏勸富民出粟賑之民賴以安擢御史去  
民追思之為祀于名宦按治淮揚不瑣瑣細務荐  
賢舉能去姦平獄人服其知大體為湖廣僉事武  
昌故多大獄元閱按每至夜分假寐輒興務得其  
情人目之為一省臯陶出巡至長沙以案牘勞瘁  
卒于署長沙學校謂元以死勤事乞俎豆于庠巡  
撫翟瓚允之遂與崇祀

王術字用仁慈谿人成化丁未進士筮仕嘉定知  
縣吏事明達民隱洞然縣故有積荒之田千頃賦



每責辦於里胥術招撫流移計口授畝給種與牛於是流民復業賦有所出時某甲捕卒讐家也卒誣甲爲盜逮繫甚衆術疑之故緩其獄不久真盜果獲民稱神明瀕海介蟲爲災術爲文驅之其害遂息具見郎中吳瑞去思碑巡按御史吳一貫書考曰作令江南第一持身天下無雙擢監察御史風采凝峻聲稱赫然劾壽寧侯張鶴齡飲酒不敬無人臣禮權貴震懾奉命查盤兩廣悉心勞悴卒于梧州提學御史黃如金博采輿論祀於嘉定名宦祠中又立三王祠以術爲首云

李文昭字誠之鄞人登成化庚子鄉薦授淮安通判飭已愛民上下安之東海有富民殺人屢年不決一訊得其情鹽城大饑道殣相望乃說守長屬寮各捐俸入并公私得米數千昭親爲粥活人以萬計沐陽有腴田數萬頃故有河澮墮高堙庠旱潦俱病昭爲疏導陂障民甚賴之頌曰東海死冤公來始白沐陽萬頃賴公封殖我今祀公惟公宜食回紇降虜馮啞八內釁南鄙勢甚猖獗撫臣張



縉檄昭監軍鼓勇誓衆遂平之撫臣上其績遷南  
寧同知至則飭已愛民一如淮焉監權梧州得羨  
餘三千金悉籍之官撫臣陳金薦遷潯州知府已  
而命下得重慶未行况村土官黃文昌猖亂乃單  
騎往諭降之既以馳驅勞瘁感瘴疾不起時論謂  
昭生以忠誠報國死以清白貽家云

王瑄字宗玉鄞人舉成化辛丑進士除臨邑令值  
歲荐饑疫癘大作瑄戶訊之投以藥物無所避忌  
白于監司不待報發粟以賑吏執不可瑄曰罪在  
令不在若也卒發之時巡按邢御史嗜蜜醞火酒  
瑄不爲饋御史大怒折辱之瑄侃侃言曰地所不  
有不敢以累民寧身受重譴耳每訟至立遣決未  
嘗收繫民歌頌之既而以艱去免喪陞南道御史  
綽著風裁尋陞長沙知府府故有吉藩群小率橫  
暴不法前守多被窘辱瑄至輒訊其渠魁白吉藩  
誅之群小大戢儀賓史朝忠與藩閹積不相能而  
承奉朱泉頗有贏貲一夕暴卒衆闖遂誣史儀賓  
利其貲而毒殺之寃不能白瑄竟爲白之其鋤強



伸抑類如此既以憂免起復卒于途瑄天性孝友  
母氏失明日抱持泣興寢食飲必親護視不去左  
右宦遊必奉以行弟性嗜酒多所乖忤一不與較  
捐已田宅與之以清約終

周津字文濟慈谿人以進士爲御史監龍江瓦屑  
二權務中貴百計啗之不可得巨璫蔣琮欲納交  
治具蕭寺托同僚致之及門而覺即策馬返閣老  
丘濬嗾人訐冢宰王恕津劾以妨賢病國舉朝譴  
之擢知九江御史周進隆以瑞州盜起刼制守令

宜選強明廉幹者治之奏徙津津至啓都御史林  
俊宜用東漢聽盜相斬除罪法林從之盜果平通  
判甘文紹家僮倡殺死囚嫁罪于津逮繫兩易寒  
暑自以身爲正官無一語及文紹瑞民擊登聞鼓  
訟冤司馬劉大夏爲之申奏還津原職逆瑾雙正  
人兩罰津輸米于邊瑞民爭先代輸後積俸鬻產  
償之在雲南治滇溢之患令鑿漢廠諸塾復開子  
河以殺其勢滇流既道以至于今所著有月航集  
東巡稿



楊守隅字惟德鄞人守陳從弟也登成化甲辰進士授工部主事改兵部車駕司司故職郵傳符檄而中貴濫用黃馬快船道路繹騷守隅請以勘合入內府需此以行宿弊遂釐舊法歲命勲臣一員董牧馬役歲終以倒死椿頭稽報時南和伯方壽祥恃寵不法守隅論置之罪出按陝西馬政剗剔宿蠹百度以貞轉職方司員外郎郎中秩滿陞江西左叅政先是寧藩祿米例石銀一兩寔逾其半守隅啓之曰朝廷分封藩室冀以庇民今江右災傷所宜軫念撫巡官欲裁減如例然不即請者務俾惠出睿思而天下以爲賢也俟其請而曲從之恩不將歸之人乎寧藩允之時逆瑾弄權流毒縉紳有誣人不法事罪應籍沒守隅獨廉其誣瑾怒先後罰米四百石遂奪職以歸瑾誅詔起原職旬宣四川適流賊藍老人麻六等下上蜀漢間勢甚猖獗守隅多方捍禦西川以寧陞廣西布政使懇乞骸骨至再得請守隅端謹淳厚性溫而厲事有不可則義形於色比歸日與諸伯仲觴詠自適未



嘗一跡城府人尤高之子茂端有隱德  
李堂字時升鄞人生時其父夢天人抱兒送之堂  
果穎異八歲日記數千言屬對敏給竦震坐客甫  
成童提學胡榮試其文大奇之即廩于郡庠登成  
化丁未進士授工部主事監稅蕪湖中官宋昂怙  
巨璫李廣勢張甚沮遏商人堂力尼之減商稅嚴  
計簿不貸絲髮昂蝨獵無地啣之然自是不復命  
中官矣陞營繕司員外調屯田司輒議免取畫士  
及銅鼓人匠革南京蘆州積弊禁易州厰科罰定

順天府功臣太監墳夫減惜薪司顧役後府柴炭  
等直添差科道官監收巾帽局皮張咸為著令陞  
營繕司郎中適清寧宮災承敕營建首請發內帑  
免徵天下以蘇民困答天戒群議工費既定堂抗  
言減十之五比工成猶贏其十之三時提督英國  
公張懋兵部尚書馬文昇工部尚書徐貫等既蒙  
膺賞聯章保堂公勤精敏翊扶聖孝宜膺殊賞有  
旨陞京職二級堂三疏辭免明年勅建禮部與修  
闕里費皆取諸夙羨民用不擾沮兵部之請罷築



京師外城停南京內府不急工役召還燒造饒器  
內臣痛抑寧藩濫請及議霸州葦地征租太重元  
宵燈火糜費太濫皆切中時宜公私賴之陞應天  
府丞會歲饑盜發訛言沸騰堂單騎諭衆咸感泣  
歸命乃執其渠魁以徇脇從者慰遣歸農四境帖  
然陞南京光祿寺卿未幾改僉都御史提督操江  
陞工部右侍郎督修京倉事竣汴徐河患告急救  
兼左僉都御史總督修濬而鎮守河南太監廖紀  
即廖棠弟也以堂提遏嚴忤恚媒孽堂遂謝病以  
歸家居十餘年閉門纂述有正學類編四明文獻  
志董山遺稿若干卷梓行于時子維孝領鄉薦仕  
終通判孫承嗣舉己未進士

魏英字士華慈谿人舉進士授博士進監察御史  
按四川土官安鰲暴亂三十餘年輒設法擒之奉  
命閱京營以卒伍耗損坐為勲戚權閹所隱占一  
糾以法不為前却陞湖廣副使永順保靖二宣慰  
分占峒寨讐殺累年英下車輒為理由直示憲典  
刻竹符多寡定罪遂皆懼伏蘄水知縣坐累下獄



數年官司率以嫌避莫為白而英獨不以嫌避力  
辯直之為江西布政寧庶人方恣橫欲盡私南昌  
所屬河泊課鈔英力拒之及諸所斲紀肆虐一不  
為借比進都御史巡撫貴州會平西苗阿雜為亂  
屠城堡僭王號英按形勢覘虛實授方任能環師  
急攻破寨六百俘斬數千招降以萬計捷聞降敕  
獎勵賜金幣蜀寇方四流劫諸郡兵連湖湘英選  
兵搗其腹中連戰破之斬獲甚衆 上復褒之因  
積苦兵間遂乞致仕家居日與賓朋賦詩飲酒恣

意所如絕口不道世事自弱冠筮仕歷 三朝更  
七命廉慎不渝而倜儻敢為臨敵制變機智溢發  
故動獲萬全然謙恭和遜未嘗自伐奏疏輒削其  
稿平生詩文若干卷號報古集

王綸字汝言慈谿人由進士除工部主事改禮部  
儀制轉主客司員外時鴻臚寺辦事通事奏乞納  
草冠帶極力沮之轉儀制司郎中各王府庶生男  
咸乞祿米悉裁之以

祖訓且請修牒限年以受封歲省百萬播州宣慰



楊愛恃舉援乞蟒龍玉帶乃即其家忠孝集以折  
之陝西守臣進古璽稱賀辨其誣歷升廣東叅政  
湖廣右布政廣西左布政所至平政均役飭舉綱  
維懋著勛伐時久次不調逆瑾方牢籠天下士資  
淺者俱獲顯擢或勸之應曰三十年嬖居忍改操  
邪萬一被螫角巾私第亦復何憾後擢都御史巡  
撫湖廣年侈盜起逆瑾橫征又脩造壽榮二府第  
動以萬計乃賑乏蠲逋計處工役民困以蘇奔父  
喪會仁化樂昌乳源連州盜犯彬桂甚熾乃奪情  
起復督兵往平之事竣歸制以疾卒于吳門綸爲  
人孝友天植色養無違與兄經終身無間言剛方  
梗介不媚流俗務爲身心經濟之學而以喜聞過  
罕言利爲座右銘其爲文平實雅淡理明意遠所  
著有學庸要旨節齋雜稿禮部要稿分守要稿承  
宣巡撫二稿尤精於醫所治無不瘳者其原病定  
方不規規泥古而卒不爽於古論者以爲丹溪復  
出也有本草集要名醫雜著爭相傳刻濟利弘多  
王純字希文慈谿人舉進士爲大理評事寺正陞



江西僉事時逆瑾憾純無所結納罰米幾千石稱  
貸間關于邊壬申陞大理寺少卿山東歸善王犯  
法詔往鞫之同事者欲張大其事純執弗可惟坐  
首惡數人民用弗擾甚稱 上意巡撫宣府密邇  
京師視諸鎮最爲要衝至則壯赤城之兵增龍門  
之戍大議屢建 上皆嘉納之在邊多斬獲功賞  
賚優渥純長身偉貌敦朴勁直出于天畀卒于家  
子鎔字時化弱冠登進士授刑部主事時巨闕犯  
大辟內批未減乃抗疏執奏罰俸者再詔獄多濫  
無敢異同平反二十餘事衆皆難之遷員外郎郎  
中權貴或以獄詞爲托還其詞知且賈禍乃乞改  
南刑部繼改南京兵部車駕司減乘傳者十之四  
五奏革內使進貢船凡五百艘省歲費數千金清  
諸衛草場大司馬王廷相倚以爲重陞雲南兵備  
副使繩束土官咸惴惴奉法轉湖廣副使置竹谿  
堡築潛江隄立正學書院以造士撫按交章薦之  
以嫉惡過嚴搆怨貴倖遂引歸言官奏起之有司  
勸駕卒不應



包澤字民望鄞人年十三立文脩行屹如老成登弘治丙辰進士拜監察御史清戎陝西查理寧夏固原諸要害經畧整整及按湖廣兢兢執法奏罷藩臬不職者勒王府侵田歸之民有叅將趙昇善權顯貴人嘗杖殺戍士奪民園舍顯貴人無敢發聞澤來密以萬金賂澤按之悉如法蕭儀賓璉凌鑠諸司王實爲之窟澤曰數亡格憲非制也盍以聞王瞿然出璉就獄所至望風解印綬去時大和宮巨璫齊姓者怙寵徼福素志漁獵聞澤按部輒戢其下曰毋縱閻羅包老擒汝矣巴東雜出洞蠻難於遙制澤乃度地宜奏設九溪永定兵備諸夷爲之警服先是澤奉命而出道經維揚運同徐紹先携千金爲科場關節浙東道僉事張賓私以二子囑皆峻絕之吾鄞有猾盜詹揀尸者善發古墓事覺繫獄暮夜啖鄰人素孟一持玉碗二黃金數定懇澤貸免澤曰此爲盜物無疑當不待教而誅者也亟言於官寘之法於是吾明盜墓之慘遂息澤之執法廉介類如此澤天性孝友事二親極其



承順二親早世諸弟妹方在襁褓澤力爲撫字俾有成立暨宦成積俸置山田四十餘畝爲諸昆弟祭祀營葬之需至析產分毫無所私有東川政績十二卷仲弟浩尚義好施稱于鄉里從弟溥字民敬弘治庚戌進士授新泰知縣凡六年政成民安陞南京監察御史以風裁稱轉泉州知府公門如水庭鮮滯訟明年入覲卒于傳舍平生廉潔自持衣不紈綺食不兼味敝廬數間僻居委巷既其死也囊無十金惟遺圖書數卷敝衣數篋人稱包孝

廉云沐字民新少授尚書於澤旣冠爲郡諸生舉止端嚴動以禮自閑春秋祀學宮同事者或少懈輒正色曰羹祝先師柰何不敬以貢授石埭訓導身率多士迪德振華各就鎔冶陞汜水教諭未拜命而卒澤從子梧字子木生而穎異讀書過目輒不忘領嘉靖壬午鄉薦通判蘇州時織造中貴怙勢傲視判故事判庭參梧獨長揖不屈諸額外取索裁革殆盡心啣之誣奏逮詔獄謫無爲州同知未幾移成都府通判尋陞漳州同知漳瀕海盜藪



長吏視爲汎常弗問梧特設奇鈎致捕繫株連不遺餘力人情殊不帖帖竟奪職歸梧爲文率奇詭雄俊自成一家言有白厓集澤孫大燿嘉靖己未進士

張曷字仲明都御史楷之孫也其先慈谿人後徙鄞以進士知鉛山縣初縣有賣薪者嗜鱸得薪直以其半市鱸歸烹食之一日從市歸乘饑恣啖頃之腹痛而死隣保疑其妻毒殺之執送官掠訊無他狀械繫踰年曷初蒞任白晝坐堂上忽有祿袍

黑幘者自門外冉冉入左右俱不覺及案前長揖曰公無疑吾乃邑中某鄉土神也鄉有冤獄未白願公雪之曷問故神曰某以中鱸毒死非妻殺也公試置群鱸於水盎中有昂首出水二三寸者必殺人烹以啖狗狗必死矣言訖不見曷如其言試之果驗遂釋其妻又甲嫁女于乙抵乙門揭幕出婦乃空輿也乙謂甲欺已訴之縣甲又謂乙戕其女互訟無驗前令逮媒從諸人訊之皆云女實升輿不知所亡卒不能決曷至以鉛山稅額過溢民



不堪命欲勘實奏省之行至邑界有大樹蔭二十餘畝不可田欲伐去之從者咸以神叢爲諫曷不聽翌日命役夫戎服鼓吹執斧斤往去樹所百步許見三人衣冠伏道左乞宥狀曷叱之不見卒命斧之樹果流血衆懼曷手斧之衆始盡力三日斷其樹樹顛有巨巢巢中有一婦人墜焉昏聩欲絕命左右掖而灌之良久始甦問其狀婦曰昔爲狂風吹至一高樓與三少年俱食以美饌時時俯瞰城市居塵歷歷可指第無階下耳少年往來率自

空中飛騰不知是樹巢也訪其家即甲女嫁乙時失去空輿者兩家訟始解曷以其木修禩宇所蔭地爲官田而悉毀諸淫祠之在境者有羊角巫能以法呪人立死一日有老嫗訴巫殺其子曷令人往捕之時巫在家謂其徒曰今日我死矣縣有捕者至其徒曰盍避諸巫曰張公正人也吾何能避乃束手待縛縛至杖滿百不傷反傷杖者手曷釋其縛謂曰汝能呪杖者死復呪杖者生吾即生汝矣試之卒不驗遂收之獄夜半烈風飛石屋瓦震



動曷曰此必巫所爲起而衣冠坐詰旦召巫謂曰  
汝以邪術惑我我以正法治汝汝欲何爲巫以首  
觸地請死曷厲聲叱之巫忽墮珠一顆光焰燭庭  
宇間又墮書一帙如掌大曷取書焚之碎其珠於  
庭立柱殺之曷釋奠凡邑中孝子節婦皆致之昨  
有節婦子持胙歸踰嶺爲虎所噬隣居惡少欲嘗  
公代婦書牒投縣稱欲得虎抵罪曷視牒笑曰奸  
民欲窘我乎與婦期以五日來曷乃齋戒作文檄  
城隍必驅虎伏辜不則毀其壇壝而更置之後五

日升堂啓門有二虎伏門外若有人繫之者曷叱  
曰吾良民子而汝食之法當抵死其無與者退一  
虎起繞伏虎一匝低尾而去其一不動殺之召婦  
人歸之虎自是喧傳目爲神人有傳四妻祝氏夫  
死舅姑欲奪之不從先是曷與民約有孀婦願嫁  
者具牒進跽羞字牌下願守者具牒進跽節字牌  
下曷判牒還之聽其嫁守祝爲舅姑給以判牒令  
守乃授以願嫁牒進曷判如其牒出舅姑謂曰張  
公判汝嫁矣汝更何待祝不得已佯許之期有日



乃粧束哭奠夫竟潛投後圃池中死舅姑怒實土  
填之事久不泄自後不雨者朞月曷憂之齋戒禱  
雨卒不雨一夕宿城隍廟中夢一婦抱牒泣訴冤  
狀曷閱狀既覺悉記其都里姓名竟詣其家鞠之  
啓土得之貌如生曷乃大慟作文祭之忽雨如注  
平地水滿尺即具殮葬如禮罪其舅姑及同謀者  
上其事于朝旌而祠祀之三年考最擢南京監  
察御史會威寧伯王鈇偕保國公朱永大監汪直  
兵部尚書陳誼將挑釁北邊抗章劾之詞連內閣

司禮又劾守備南京太監蔣琮鬻放軍伍琮反譴  
曷擅作威福左遷通政司經歷尋以薦陞四川僉  
事有陳都指揮壻樓一處子既而殺之以滅跡其  
父訴于御史曰陳家黃金鉅萬非張僉事莫可雪  
寃者事乃下曷曷欲法之而御史竟受賕移獄他  
所脫之轉本司副使率又執法軌道如擒燒丹方  
士而劾太監馬璫信聽之妄其執節不回類如此  
自以觸忤當道不容于時即棄官歸閉門著書一  
十九年足未嘗一跡公府啜粥飲水兒女子恒饑



寧波府志卷三十一  
寒不爲意超然容與日以經史自娛都御史王璟  
以賑饑行部廉其貧以百金爲壽曷堅却不受王  
請之固乃受下戶饑民例一分以荅其意至死不  
能具含殮郡守周坤率僚佐共治其喪云曷於流  
俗不屑苟同而對衆坦坦不爲防畛見後進未嘗  
不以道義相勗有歸田稿棟庄集寓鳴集經史訓  
戒一百二十卷藏于家

金洪字惟深鄞人南京武庫郎中亮之子舉成化  
丁未進士授靖江知縣歲餘以才堪治劇改令吳  
江靖民立石建祠尸祝之吳江素稱難治時復豪  
猾縱橫賦役繁劇小民沾危罷於奔命每占一役  
不破產殞軀不爲止長區賦者率視爲鬼域洪歎  
曰虐政有甚此者乎乃裁抑勢家剗革狡吏廣分  
之役以殺其力歲裁冗費銀米緡錢凡數十萬公  
無逋負而私鮮破家之虞吳民德之至有生子以  
金命姓者當道爲請于朝頒其法通行焉每六察  
至獨吳江無訟反怪問之郡守曰金令故善撫民  
也時邑連饑保留在任者凡七年陞御史差巡按



陝西并敕督修邊罷免大小文武官數百員時有以車載冠之誣齷齪之徒皆望風解印綬去條陳地方便宜十事俱見施行興利舉廢疏奏種種差山東巡按有二巨闖出選 武皇帝婚勢焰薰灼所至需索動以千計洪乃先發一檄盛稱二使廉正有司宜爲遵奉不許妄有科率損使者賢名所在張之且度其行跡輒尾其後竟不得肆又勢闖多以家人冒充勇士廢耗月糧洪奏請裁革每月減糧數千石青州賊戴崇濟南賊楊叙嘯聚爲患

久而弗靖洪即設法勦平之又陳地方便宜十事亦皆施行洪前後裁抑闖宦逆瑾不能堪揭其名于壁又使人諷之冀以賂謝卒不爲理乃欲擯之邊郡而吏部持之得補松江瑾怒未解前在陝西犯婦梁計兒因姦謀殺親夫傷而不死辟案已成洪以其夫不親告言爲辯出之瑾迺駁洪有私矯旨爲民而猶欲深中之會洪嘗減松江官布價米庫闖不得賂詭以布惡言於瑾械洪至京賴案牘明甚竟不能害瑾既誅凡經瑾黜者詔許查復洪



竟不起子樸正德丁丑進士仕終職方主事

陸佃字君美鄞人刑部尚書康僖公瑜之從孫也  
登弘治癸丑進士授監察御史刷卷廣東巡按福  
建山東皆銳於經畧風裁獨持所至稱澄清云陞  
福建按察副使巡視海道時海寇充斥編戶焚蕩  
佃乃濱水戰火攻之法距擊之而又設畫樹防什  
伍海艘程出入時往來立賞格嚴哨探定保甲邊  
徼肅然已而汀漳山氓嘯聚爲盜當路者以兵事  
屬之佃增築三堡據險守要謀賊半至靡伏卒突

之又張奇夾擣倭無筭地方底寧閩人德之勒  
石月港以紀茂勛及被論免歸監司行部每見咨  
訪輒縷縷陳說利害如障陂東湖增后它山堰皆  
惠利一鄉孝友天至親亡躬負土以葬兄病親爲  
嘗藥乃其大者其子曰鈞曰銓曰鈇鈞字容之正  
德甲戌進士授南京車駕主事司故職郵傳符檄  
繹騷獨綜理井井而中貴濫用黃馬快船裁減殆  
十之五六轉貢外郎郎中尋陞安慶知府自逆濠  
之變毒干兵燹鈞至務以安靜拊循之尤加意學



寧波府志卷之八  
三二  
校比大侵則爲粥食之全活者以萬計已而陞貴  
州按察副使兵備龍里時龍猴二場軍夷以貿易  
亂鈎往治之故戮死囚數人狗衆褫其鬼遂繫倡  
亂者戮之餘皆帖帖服乃王景羅者集黑苗入寇  
鈎馳至檄諭大義衆即解去歷陞廣西按察使江  
西右布政使福建左布政使所至皆有表樹陞巡  
撫保定都御史禁侈靡清侵冒鎮撫達官飭固城  
守咸經制遠圖不瑣瑣旦夕謀也會 聖駕南巡  
鈎倉卒經畫百務立辦而中貴與都護輩索賂不

與遂犯衆怒而御史胡守中因中之落職歸竟卒  
銓字選之嘉靖癸未以易魁春闈除刑部主事遂  
以才典章奏改兵部武選陞武庫員外郎禮部儀  
制郎中時 上方稽古禮文以隆制作議四郊九  
嬪親蚕親籍諸禮內降旁午而討論陳奏頃刻凡  
數四宗伯大臣盡倚以爲辦莫不當 上心資望  
功賞皆宜得右秩而內閣輔臣以圖上祭器不先  
關白遂大忤意遷福建按察添註副使益爲策勵  
嘗攝海道漳故盜藪而利窟也諸射利奸人多以



厚貨餌監司闡出爲患獨嚴立禁網剗剔奸蠹卒  
不爲諸射利者餌陞河南叅政撫民南陽陞廣西  
按察使時弩灘猺賊侯公丁雜處胡藍二姓之間  
相助爲寇或議大舉兵盡誅之銓曰堅賊黨而分  
我兵且逆順難明非計之得也不若計織渠魁而  
撫其餘監軍者如其言而弩灘果平隨陞廣東右  
布政使以內艱居家卒銓質性英銳讀古書一目  
即解解即不忘操筆爲文即奇氣橫發滾滾莫禦  
而卒不戾於矩度雄視天下謂豪俊莫能相先而  
當官蒞政剗繁解劇不啻庖丁之游刃也時方以  
偉烈期之而竟齋志以沒識者憾焉銓別有傳  
陸健字文順鄞人初爲郡庠生輒白僉事陰子淑  
悉毀淫祠以戒香地徙寶雲寺而拓學宮諸僧尼  
師巫屏竄殆盡舉壬戌進士官刑曹陞貴州僉事  
持憲棘棘不阿會乖西苗亂久之官司莫能致討  
乃首先戎行深入其阻遂平之時御史刷卷者盛  
氣凌兩司兩司官率俛首下之健獨與抗即公堂  
執其奸人用是他御史嚙之沒其戰功已而轉福



建副使憤恚遽卒囊無留貲會鄉人姚鏞與同僚  
爲之治棺歛歸其喪

張時孜字惟善鄞人生有異質甫童時試之對偶  
輒應聲就數又奇中又能援筆爲詩詞長老大異  
之比長沈潛經史博通外家言爲文鋒勁美麗迥  
特不凡友人竊相語曰生踽踽啞啞惟直柔耳而  
文則不類何居父東臯公有遺稿嘗逸其半潛思  
手錄竟不遺一字其妙悟如此舉進士除令東莞  
以憂歸旣又改令萍鄉萍鄉故涓邑吏弊蝟叢紛

不可理又屬當孔道冠蓋襍遯縣令日策馬往來  
送迎又時時羅列盤盂饋餉客比歸則張燈燭鼓  
鑿鑿漏下矣時孜至乃不策馬往來送迎客又不  
羅列饋餉顧日坐堂上較簿握筭搜剔殘蠹瞿瞿  
矻矻窮宵旦不休或諷之自爲計者則應曰夫吾  
身易逸耳萬民寄命焉甘苦戚休誰當恤者且財  
於民甚急也凡所爲厚遺達官將以徼榮耳榮不  
榮於吾身甚薄也吾縱不能子視吾民獨柰何以  
其所甚急易吾所甚薄者耶卒不送迎饋餉客愈



益勞不休方乃裁冗費鋤豪惡毀淫祠興學校平  
反冤獄布德施惠與民更始會天旱行禱雨雨隨  
車而至時廨舍有蓮一幹雙葩人以爲異感云然  
稟故羸也不治美飲食又日勞不休監司檄至必  
躬爲條對民爭訟則諄諄省辨唇脣焦火蒸蒸起  
久之困不能勝則曰吾有三不足饑不遑食倦不  
遑寐垢不遑櫛浴孰與田農哉竟坐是病比入覲  
已不能支矣乃猶與僮僕共粗糲至不能具安車  
病甚竟死萍人戶德之飲食必尸祝曰生我者張  
公也巳乃祠之學宮史氏志之曰律身勤慎門無  
私謁治官如家旦起視事至夜分不輟食寢爲廢  
坐劬劇致疾所著有岫雲稿

陳槐字公輔鄞人生質穎異弱冠魁鄉薦登弘治  
乙丑進士授松溪知縣勞心撫字賑荒弭盜惟日  
孜孜時逆瑾用事巨璫奉璽書至諸令長靡不懾  
競以餌啗獨槐不爲餌松素不習弦誦乃大興學  
舍朝夕督課彬彬稱武城矣陞刑部主事去士民  
祠祀之其在刑部多所平反如白王氏七年殺夫



之寃折皇親九奏爭地之擾乃其大者積資陞武昌知府至則汰酷吏剪豪民開河套平巨寇歸王府侵田于民奪鎮守私侵湖課政績爲諸郡望尋以病乞休并條陳十三事疏三上乃允正德戊寅用湖廣撫按薦起知撫州未數月而頌聲作復以病乞休明年六月逆濠不軌人情洶洶槐矍然起曰即湏臾死可不揅甲赴耶遂對濠使手焚其僞檄宣布大義文告四方乞兵都御史王守仁願爲犄角諭村落各相守望牒諸郡縣爲聯絡之勢已

而守仁檄諸郡會兵槐獨與吉安知府伍文定先赴遂俘馘逆黨拱杆等已遂收復九江南康諸郡擢江西兵備副使檻送元惡詣京師時武皇帝南巡槐獻俘留都具奏八事上多嘉納之會辰州苗叛當道謂非槐不治奏改湖廣兵備已復以勛勞留京扈從至通州移病以歸而御史楊材以宿憾中之落職今天子御極錄平濠功有文綺白金之錫用是公論漸張守仁與方獻夫胡世寧輩先後宣其績于朝表著矣已而守仁被誣竟不



得直居閒二十餘年與客論古今事變當成敗鑿鑿如指掌遇官府及諸鄉黨不法事輒誦言攻之不少諱如力主楊允恭奏廣德湖田官賦率得輕折尤著功惠鄉民爲立祠祀之云所著有金陵百詠論奏遺草星曆辯析半湖集

呂和字克中鄞人生有異質戊午領鄉薦繼登弘治己未進士出尹臨淮臨淮故皇陵重地開國勲裔在焉又水陸要衝財匱民困而豪右併肆侵漁和至挈持維綱鋤削荒穢百度聿新值歲歉發

公帑無貸種以賑助之民用甦息又擇子弟之秀異者聚之學舍時給筆札躬爲程試毀淫祠四十五所撤其材葺新公宇僧尼悉還編籍毋內使出其治恣貪虐費且不貲和乃覈符驗緩急而節量之治其尤橫者由是多假他道以去外若興水利輕丁役均稅糧修馬政節財用抑強扶善類不可殫述丁父憂歸濠民悲號弗禁爲圖像祀之服闋改建平道出臨淮民遮道挽留郡守邊冀以簡書畏嚴諭曉再四始聽出境建平俗囂囂喜爭訟素



稱難治和案其豪黠不可化誨者若宗友八輩窮治之姦惡斂戢時黃河水溢臨淮民赴闕奏改和而建平民恐聽之去即數十百人往爭之士大夫莫不嘆異以為未之前聞也陞刑部主事員外郎山東按察僉事有王尚書弟倚勢殺人當道莫敢誰何竟致之辟長清縣令劉儒內結權貴貪酷靡所忌痛繩之即誣和下詔獄久之始白臨清衛指揮柏紹縱暴巡按屬和治紹素懼和逃之京匿權璫家和差官兵呼於皇城外捕之得竟蒞其罪遷

陝西副使撫治漢中積蠹振刷繕漢中寧羗諸城立南鄭金州諸學酌丁差之規停更番之戍州縣民各立祠祀之進四川按察使便道上隴而以倨傲拂衆遂被論落職人惜其不善持盈云

王應鵬字天宇鄞人性貞嚴沉毅年十六遊郡庠即有志經濟挺然以豪傑自負比長造詣益深戊辰登進士出宰嘉定律已廉慎鋤暴植弱均徭役寬宿逋節民財為諸生立文會析經講道絃誦颯颯焉每觀風使至輒表異政甲戌被召民遽留不



得立碑建祠以祀之拜監察御史立朝彈劾無所避時武宗微行及取佛烏思藏爭之甚力丁丑清戎入閩兼理漕政興革得宜時鎮守崔太監縱部下鄭八李鎬漁利虐民阻撓法憲輒擒之貽書戒崔民用不擾庚辰出按山東務持大體鏟邪剔蠹不數月而風清齊魯壬午督學畿內甲申擢河南副使仍督學政所至崇雅黜浮以身爲教士多興起丁亥觀察山東甫三月擢僉都御史撫畿內達軍王朝相等弄兵遂討平之境內按堵無何晉

寇陳卿倡亂當道謂非應鵬不治改巡撫山西先聲赫赫不廢一矢而俘擒元惡聲振朝野尋以父喪去位服闋起副都御史總憲內臺條陳時政以義利名實四字悟上言甚凱切旣而以臺愆下詔獄科道冒斧鉞論救被譴斥者相踵遂落職歸怡然山水間觸物題詠若將終身焉巡按御史及兩京科道暨吏部胥以起廢薦竟以疾卒應鵬天性孝友戶庭無間言於物無所嗜好雖權量不識顧獨好尚論古人即在仕途未嘗忘問學不妄言



笑作事確有定守遇變故不懾所著有閩疏稿東臺稿撫畿稿雜著稿凡若干卷

汪玉字汝成世居鄞之大雷山故號雷峯沉毅重厚髫鬣如成人年十六七讀性理諸書潛思默悟慨然以聖賢自期挺挺不群人望之如神駒鳳雛云領弘治辛酉鄉薦戊辰舉進士授刑部主事轉員外郎陞湖廣按察僉事攝辰沅兵備永順土官故富強稱兵侵保靖地權貴多爲所餌會勅大臣按治又有爲之左右者玉持之益堅卒正其罪先

是永順唱玉以金貝命擒其使使故匿去乃心銜玉陰令刺客偵之而玉屹弗爲動嘗構書院於沅之明山日聚生徒講誦士多興起已卯更巡武黃會逆濠陷九江接壤黃蘄吏民豕駭欲竄玉獨沿流入蘄諭戒日夜修城增埤募民集兵皆越宿而備境內安堵能聲益起然弗屑脂韋取容積勤六年薦剡不一及巡按御史毛伯溫特疏其才節擢郴桂兵備副使強賊王廷鑑爲梗率民兵搗而殄之竟不以功聞於當道及丁外艱服闋補臨清兵



備稽費省役姦蠹屏戢陞山東按察使者幼泣送  
蒲車下尋陞巡撫順天都御史首議別賢否明賞  
罰示懲勸以汰邊將論罷其尤不法者二人邊徼  
肅清已而畿內賊楊恭倡亂京師震動玉調叅將  
郝通指授方畧不日擒之居無何以勛病渴懇  
疏乞休不允竟不起玉高才勁氣獨立不懼知命  
而不惑論人必求心術之微天下鮮有當其意者  
已或有失雖纖微不自蔽於柔佞人疾之如仇終  
不爲所悅云所著有二書粹義書經存疑雜錄記

敝篋留稿

黃宗明字誠甫鄞人正德甲戌進士授南京武庫  
主事陞武選貢外郎時王守仁倡道學宗明從之  
遊論說良知之旨會寧藩孽啓遽上江防三策爲  
大司馬喬宇所重復疏諫南巡尋乞疾歸辛巳陞  
工部郎中不起癸未補南刑部會大禮議起朝紳  
群咻之而宗明與二三人者論獨合至署丞何淵  
復請入太廟宗明即疏不可乙酉出守吉安首建  
白鷺洲書院以道德勗諸生其爲政務以戢暴子



良興廢舉墜綱紀秩秩濠遺孽朱祥阻隘嘯衆白  
晝擁肩輿劫城市官府不敢捕宗明計發兵潛布  
賊舍旁候除日牒郡僚托他事至其所一鼓而縛  
祥父子與其徒無一脫人皆奇之丙戌轉福建鹽  
運使丁亥召修明倫大典丁內艱服闋陞光祿卿  
即籍光祿經費疏乞防奢止慾正德養身定經制  
芟貪饒上納之著爲令又應詔言四事曰求財勵  
志定計責任皆切時弊陞兵部右侍郎編修楊名  
言權貴下獄時以大禮大獄之後漸生黨議宗明

上疏言楊名罪不罪宜有定法然罪一楊名而必  
求主使之入延及善類將盡於一網其關國家元  
氣不小乞寬名罪無窮其事遂并得罪出參政閩  
省已乃召補禮部會 莊肅皇后晏駕廷議欲從  
殺禮宗明力爭之遼陽廣寧軍變復疏論乞擒渠  
魁以昭國體議者偉之轉左侍郎未幾卒宗明爲  
人溫厚寧靜然諒直不阿風節昭著以是頗與貴  
勢不相能竟挺挺無所屈其應變成務沉幾默運  
確有定力人以爲心學之驗云



寧波府志卷三十八  
謝汝儀字國正鄞人生而凝重沉毅力學不懈孝友篤至自少鞠於祖母戀慕尤甚登甲戌進士授餘干知縣甫至即蚤夜策勵肫肫務遠圖不爲旦夕計縣當孔道商稅不貲慮出入無藝立計簿稽盈縮額外不入一錢時中貴監督茶稅聲勢薰灼汝儀棘棘不少阿迄不得肆其暴富民丘氏殺人坐死賄囑者欲出之不聽卒問如律無何聞父喪去士民泣擁道周爲之樹碑以識去思服闋擢監察御史首疏安慶指揮崔文進賢知縣劉源清之

功効外戚陳萬年宦官王堂時春及奸黨何明等罪狀直聲大著尋督直隸三省馬政已又巡按廣西亟于殄寇安民而制馭猙獍區畫精詳殄思恩之寇弭岑猛之變乃其大者上疏乞寬假議禮諸臣請誅巨璫谷大用等首觸忌諱人爲廩廩陞按察僉事備兵嶺東擒大盜魯蛇仔轉兵備漳南設防海四策時流賊李良武輩聞風解散海道肅清尋進巡海副使奏設詔安縣安邊館立墩臺蓄蕃兵爲一方保障視臬篆辯陳大淵等死罪二十四



人朝議褒之陞雲南叅政下車搜剔姦蠹十餘事  
築尋甸嵩明二城滇南賴焉遷江西按察使便道  
歸省適祖母疾卒汝儀喪之過於哀毀遂相繼以  
沒汝儀平生峻整終日斬斬自持對至親愛未嘗  
輕有語咲至道義孚契即膠結不解衆中默默若  
無所臧否及遇大事臨大患壁立萬仞毅然不可  
犯比死竟不能償宿逋家無以爲養知與不知咸  
爲之痛悼云

柴經字季常鄞人生而秀穎不煩師訓而績學藝  
文輒能屈其先輩以書魁正德庚午鄉試丁丑舉  
進士授刑部主事凡冤獄必湔雪惟允藁城張司  
寇雅重之轉署員外郎尋轉雲南按察僉事以憂  
去起補湖廣威信並著風動三楚有鄭生者以冤  
陷獄監司嫌其富不爲理經竟直之沅州判官恣  
酷墨會與當路姻無敢問者經輒按治如法歷遷  
貴州叅議江西按察副使轉廣東按察使持憲肅  
紀守正格物遷右布政使以憂去起補四川尋轉  
左使遷南京都察院右副都御史提督操江飭兵



政明體統清卒伍增戰艦補操戍諸凡捍禦之備  
罔不井井嘗視院篆兼署大理寺會法司有為言  
官修故怨者文致人死罪池州守亦為前守滅仇  
家且籍其貲株連者十數輩經皆平反之故諸人  
銜入骨因嗾言官攻之而當道者不察竟落籍以  
歸經天性孝友事父母曲盡其孝撫愛諸弟不遺  
餘力每俸入必均分之居官介介門無私交自蜀  
陟內臺時僚屬修故例饋贐經一不受足未嘗跡  
倖門雖親故在通顯不一抵書問與人交無熟語

亦無矯行臨大事決大疑則侃侃不回而以一言  
定是非人有過不宣有一善即揚之故人皆稱為  
長者子應賓仕終福寧知州

沈教字敬敷慈人正德甲戌進士筮仕豐城知縣  
以憂去改桐城沉毅有識篤於愛民桐故孔道值  
宸濠之變巨闔悍將駐兵江上供億無算教力為  
裁損民忘其勞建桐谿書院置學田以造士桐邑  
稱治擢御史巡按雲南會尋甸土酋安銓構亂武  
定土舍鳳朝文應之六詔震動夙夜籌策數月不



寧波府志卷之八  
解帶卒以底定時在盛年鬚為之白以是著聲朝  
野歷藩臬為光祿卿陟副都御史提督南京糧儲  
致仕而卒

周旋字克敬由進士除南京戶科給事轉北京兵  
科給事時北虜猖蹶條陳方畧咸中時宜舊制各  
營畜牧俱有分地以權貴侵奪告病旋奉 勅查  
復惟中官皇庄不可問因上奏曰 陛下天下主  
母后享天下之奉何必私牧地頃畝之入而後給  
哉遂罷之在科九年屢上疏論事剴切已而出叅

廣潘計平蘇孟剽之亂人多其績性好學雖仕途  
倥偬手不釋卷所著有西溪小稿杜詩質疑東湖  
十咏慈谿誌草

戴賢字時重鄞人生而英異不與常見群稍長覽  
究墳籍過目不忘為文章頃刻千餘言皆驚人語  
登正德丁丑進士官刑曹督獄見繫囚滯穢令櫛  
沐以蘇癘有方士能言陰事多驗卿相以下迎致  
恐後獨心知其妖檄召訊之果挾採生術遂寘之  
法遷四川僉事整飭安綿兵備至則繕樓櫓遠斥



寧波府志卷三十八  
本  
候選將練兵諭羗戎以威信不敢犯境民獲安息  
龍州土官先是多以賕結兵備恣肆干紀莫敢誰  
何至與同食燕鰲以法束之不少貸假至縮縮不  
敢吐氣涪江當松維襄漢孔道而風波洶湧渡每  
不測鰲即戒工市材造舟三十二爲梁四十餘丈  
橫亘如坦途又立法守之其爲民興利多此類也  
未幾以忤時宰奪職家居八年會時宰物故起爲  
河南僉事尋轉江西叅議提督糧儲江西故多逋  
負每鈎稽輒緣吏胥爲奸不可振刷鰲至立格倣

前史年表例逐歲而稽奸不得行而乾沒者悉償  
其逋無復負者陞副使兵備饒州兼督造尚方磁  
器時窰戶爭利持矛相殺鰲爲條畫禁治爭鬪遂  
息又以不能媚悅後相嗾言官中以浮語竟坐投  
閒者四年起爲廣西府江兵備時徭僮嘯聚稱亂  
幕府謀大舉兵征之衆議旁午鰲曰此不足煩大  
兵也特密選精銳數百命指揮林瑞等分爲犄角  
授以方畧深入仙迴松林歸化馬尾石田等山繞  
出賊腹大破之斬首百餘級俘其酋豪數十輩黨



聖清通志卷三十八  
李  
悉烏散江道肅清陞江西叅政復陞山西按察使  
振飭憲典官僚嚴之有奄豎殺人匿宗室中吏不  
敢何問豎即收捕付獄聞者悚息轉廣西右布政  
使改四川左使丁外艱服闋補江西陞四川巡撫  
都御史入蜀革煩苛孜孜以保釐爲計所隸諸部  
雖羊腸鳥道必輕車詣之問民所疾苦故老相傳  
以爲撫臣旌節二百年來僅一睹見也由是西土  
將士躍然歸心而江西舊僚有嘆豎者竟以飛謗  
傾之落職而歸初豎家居見河渠不飭作鄞水利

三叙見貪人利番舶闌出無忌作海防策其言皆  
鑿鑿不爽豎精於吏事而負氣高亢不俯首權貴  
又不爲同事者所懽故動見沮抑不竟所施云所  
著有戴中丞集若干卷

陳璧字天瑞少孤力學備歷艱劬舉正德丁丑進  
士出知滁州滁故孔道使輶踵續爲斤斤省節適  
武皇南巡隣郡徵發繹騷璧獨不爲科率民甚德  
之他所興罷大都惠利永永計也已而陞刑部員  
外郎盡心庶獄時錢寧婿左府都督齊佐以姦黨



亂政魏彬弟錦衣千戶魏英以內亂俱坐死而巨  
璫奉命清審大獄力欲出之壁直前爭曰佐受廖  
堂萬金用鎮陝西陷人死無筭英姦子婦因而殺  
死王長隨此而可縱孰不可縱二人竟不得出轉  
江西僉事獎廉黜墨風紀肅然先是布政梁宸坐  
附逆濠論死御史巡按者承當道意欲寬宸壁曰  
宸一省長吏乃爲逆濠署僞檄遍移各藩罪有浮  
此者乎無將之戒公寧不聞也宸不果釋而當道  
深心銜之乃改調四川已又勒令罷免壁外和內

剛與人寡合自釋褐爲五品凡二十餘年不增一  
級旣歸薄田不滿百畝生事僅給未嘗少有干請  
至樵牧稼藝之事皆身親爲之清修之節人以爲  
難云

向欽字德恭慈谿人幼嗜學挾策未嘗釋手應五  
經試入學家貧資修儀以養父母門人經指授登  
甲科者相望以貢授宜春訓導進諸生日與講授  
施及旁郡邑暨從宦子弟皆來學間有貧不自存  
者欽量資給之言及于利輒面爲發赤遷新塗教



寧波府志卷三十一  
諭值峽江縣初析諸生在析中者義不忍舍願歸  
舊學者數十人父卒終喪遂致仕。

陳文譽字德卿慈谿人性謙和孝友聘妻馮氏病  
父母欲為改婚固辭曰古人有娶瞽者柰何棄之  
卒娶焉妻早卒竟以有子不再娶舉癸未進士丁  
憂服闋授刑部主事承命論囚南畿時有趙姓者  
怙富稔惡犯死刑屢賄免不決文譽必戮之闔郡  
稱快遷貞外郎郎中審錄江西多所平反具載溥  
天澤錄中大學士楊一清被誣下法司覈治諸曹

剛與人寡合自釋褐為五品凡二十餘年不增一  
級既歸薄田不滿百畝生事僅給未嘗少有干請  
至樵牧稼藝之事皆身親為之清修之節人以為  
難云

向欽字德恭慈谿人幼嗜學挾策未嘗釋手應五  
經試入學家貧資修儀以養父母門人經指授登  
甲科者相望以貢授宜春訓導進諸生日與講授  
施及旁郡邑暨從宦子弟皆來學間有貧不自存  
者欽量資給之言及于利輒面為發赤遷新塗教



寧波府志卷之八  
諭值峽江縣初析諸生在析中者義不忍舍願歸  
舊學者數十人父卒終喪遂致仕

陳文譽字德卿慈谿人性謙和孝友聘妻馮氏病  
父母欲為改婚固辭曰古人有娶瞽者柰何棄之  
卒娶焉妻早卒竟以有子不再娶舉癸未進士丁  
憂服闋授刑部主事承命論囚南畿時有趙姓者  
怙富稔惡犯死刑屢賄免不決文譽必戮之闔郡  
稱快遷貢外郎郎中審錄江西多所平反具載溥  
天澤錄中大學士楊一清被誣下法司覈治諸曹

難之文譽厲色曰顧事實不實耳何愛於楊公何  
畏於內府事竟得理出知鎮江府杜請托輕徭役  
五年之內百姓晏然以忤當道罷免居林下清介  
不渝有同年為巡按御史令有司以坊牌價遺之  
辭曰吾為官一介不取乃取償於鄉人耶竟却之  
馮震字孟元慈谿人由進士授行人奉使歸省適  
父病夙夜侍湯藥容貌骨立比卒哀毀踰節三年  
不出門服闋授貴州道監察御史巡按湖廣防範  
禁戢細大不遺廉核庶官旌勤斥濫風裁肅然監



秋試綜理精密得士爲多後以註誤被逮褫職家居杜門誦讀澹泊自將絕不干於人人皆高之萬表字民望世爲寧波衛指揮僉事表十七襲祖職輒以讀書學古爲務恂恂儒生也嘗出舍教場之側晝則馳馬習射夜則諷誦經史及孫吳兵法求自表見上官才之委理軍政輒治正德庚辰會試武舉中式遂視衛篆進都指揮運糧已又推浙江都司掌印已又推南京大教場坐營已又擢漕運叅將擢南京錦衣衛僉書興利舉廢所至皆有異政引疾乞休已又復起爲漕運叅將又乞休起爲廣西副總兵又乞休起爲左府都督充漕運總兵遷南京中軍都督府僉書又乞休甲寅會倭寇大開朝議博求將才復起爲南京中府都督僉事輒自奮曰主憂臣辱此豈臣子惜命之日乎遂探甲就道隨賊所在率兵禦之瀕死者數事多不載乙卯病劇不支懇疏謝事而歸未幾遂卒表兒時已異於常人及長好學不倦政事之暇輒從事簡牘旁搜遠紹務於實用不徒勦竊浮言嘗病中閉



明灼艾博采古人言行可以範世善俗者類爲一帙名曰灼艾集又取先儒之言集其要語名曰四書叅考又與騷人墨士贈答題咏名曰玩鹿亭稿踪跡所至時與陽明王守仁之徒談說理學世所稱名士蓋無不納交焉平生尤以輸忠弼王樹績揚休爲志如疏漕政之利弊論攘夷之方畧要皆鑿鑿可見之施行者也性至篤孝早歲喪父孺慕不已朝夕奉母教惟謹出入起居罔敢弗咨雖造次微過必深自警惕懼傷親心其職漕也疏乞將

母以養母有憂百計慰解怒則涕泣長跼請罪必怡懌而後已母疾輒廢食寢起居湯藥必身親之每夕稽顙北辰求以身代比卒哀慟踰節屢絕屢甦家人或勸之曰母死何以身爲乃若睦族恤姻字孤賑乏夙夜所爲孜孜如施粥施藥治道途修亭舍皆捐已貲爲之性喜澹泊自奉寒約如窶人子官至樞府歲入無餘儲家人計口而食常至空乏居無華屋衣不紈綺食不兼味恒以消息盈虛之理自律每遇盛滿則退然自抑不輒任情恣睢



人以是多之

桂伯諒字守誠慈谿人少孤貧耽玩經史雖隆寒盛暑不輟領浙江己卯鄉薦授江西龍泉知縣嚴慈並行擢南京刑部出知銅仁府未滿乞休進階大中大夫致仕民遮道泣留不可爲之立碑頌德云家居杜門蕭然出已貲敦復祖廟寘贍田以公諸族令子弟讀書其中里人稱爲節孝先生袁太史爲碑文紀之

司馬氏曰余讀古史氏傳未嘗不嘆穆叔之言不

誣也太上立德其次立功其次立言士不邁雲龍之會困于塩車則亦已矣如其策名天府持尺寸之柄舍功德其何以哉是故用文用武爲術不同歸在竭乘車之義標芳名於不朽者也然而不能欺者子產之治不忍欺者單父之治不敢欺者西門豹之治緩急異施疇非民之父母國之股肱乎予明士大夫從政四方代有聞人要其治狀盖焯焯可徵也後有作者景冰檠之操軌經綸之跡庶幾有所興起乎



寧波府志卷二十八

寧波府志卷二十八



